

# Te Kopara.

NAMA 78.

GISBORNE.

HURAE 31, 1920

*"Iti te Kopara, kai takirikiri ana i runga i te Kahikatea."*

## Oranga Minita.

**K**UA taumaha rawa nga minita i te kaha o te piki o te utu o nga mea katoa, a ko to ratou utu kei te ahua ano o nga wa i mua o te whawhai. Kaore ranei nga rangatira o te iwi Maori e whai-whakaaro ki te iti rawa o te oranga o ratou minita ka rapu tikanga ai mo te whakapiki i o ratou oranga. Ko te utu mo nga minita pakeha kua piki ki te £350 i te tau. Ko nga pakeha tonu o te pariha kei te whakahaere tikanga e kitea ai te oranga o te minita. Tokotoru rawa nga pariha pakeha e whai Tabua ana. Apiti ki tenei oranga ko nga Ohaoha o te Ra o te Aranga tukuna katoatia ai ma te Minita. Nga ohaoha i Turanga i te Ra o te Aranga ka huri ake nei i tae ki te £240. Ka apiti tenei ki te oranga ake o te minita. He tikanga tawhito tenei na te pakeha, ara te whakaaaro ki o ratou minita i te Ra o te Aranga. Ko te ture a te Hahi tera, ara te tapae i nga ohaoha o te Easter (Ra Aranga) ma te minita. He mea pai kia mau tenei tikanga i nga pariha Maori. Kaua hoki nga minita e whakama ki te tango i taua ohaoha. Kia mahara nga Komiti o te Hahi i tena pariha i tena pariha ki tenei tikanga tawhito ka whakamahara ai ki nga mema o te pariha i mua tata atu, kia waiho ai nga hiki-pene mo etahi atu Ratapu, hei te Ra Aranga tukuna te aroha kia kitea e te minita. Kanui nga ra mo te amuamu ki o tatou minita, engari hei taua ra kia ngawari kia aroha. He tikanga pai ano te whakaaro ki nga minita i nga wa iriiri, i nga wa marena. I te wa Karakia whakawhetai a te wahine kei te whakaatu tonu te rupiriki whakamutunga o taua karakia "me homai e te Wahine e haere mai ana ki te whakawhetai nga mea e tika ana." Ko te takanga o mua iho ka tuku aroha te wahine ki te pononga a te Atua i te wa o tana Whakawhetai. Ko tenei ohaoha me haere tika ki te minita, kaua ki te takotora o nga moni a te Hahi. Engari me tuku e te wahine i te wa o tana karakiatanga, ki roto ano hoki i te whare-karakia mehemea he whare karakia kei tona wahi.



Mo te Mate Poho me te Rewharewha me kai i te

WOODS' GREAT PEPPERMINT CURE, 1/6, 1/9 patara.